

花事吟稿

1. 花稿總序

每嘆浮生多雜沓，寄情花樹志彌堅。芬芳氣味相投契，旖旎風華豈比肩？
梁甫吟成催白髮，華胥夢醒自嬋娟。紅塵回首千般事，榮枯迴環一偈禪。

2. 臺北故宮至善園牡丹展

閨苑一隅秀牡丹，春閨韓壽逸馨攢。含苞似睡移更漏，翠幄籠霞護曉寒。
至善園中傾國艷，沈香亭畔幾回看。競誇天下無雙色，帶笑人花兩自歡。

3. 冬往南投仁愛鄉賞初開白梅

料峭輕寒霧乍開，羅浮雪舞到蓬萊。縞仙新泛銀河棹，幽夢冷隨玉樹臺。
珍重暗香休踏碎，愛憐疎影幾低回。此情無計能消歇，數朵芳華約鬢來。

趙執信《談龍錄》，錄有隋代趙師雄遊羅浮山，夢見梅花化為淡妝素服之美人，與其歡宴歌舞故事一則。

4. 春節行遊花苑，購得金橘樹一對

花苑栽金橘，鮮澄映翠嵐。佇看新葉燦，憑想蜜滋甘。遷植移樓頂，鍾情向日南。
饑貓來復往，伸爪此中探。

5. 詠學院春風桃李園

鬢舍巍峨聳碧峰，春風桃李滿園濃。樹人樹藝培樑棟，傳藝傳經育鳳龍。
礪出英才家國用，修來善德士民宗。幾經雕琢茹辛苦，浩蕩芬芳世景從。

6. 畫蘭兼懷柳如是

淨洗根苗不染灰，怕它添墨惱花猜。高標本自危崖出，香草豈因溫室開。
無奈國家多濩落，空遺鏡曲屢低徊。毫端蘊秀堪憑寫，醉酌娉婷酒一杯。

柳如是：詠蕙蘭、題顧橫波夫人墨蘭圖冊

7. 詠竹子湖海芋

小隱離朝市，湖花兩忘塵。山青凝翠梗，水冽發晶純。減損千叢艷，無為一抹真。蒼茫猶獨立，雨後更清新。

8. 憶東山玫瑰花園

暖日薰風蜂蝶鬧，草堂長憶故東郊。相攜姐妹纖纖手，不將春色等閒拋。
歡欣意興遊園夢，棠棣情親似漆膠。排闥朱門長驅入，屐痕深淺鴨綠坳。
三兩老農除莠草，精挑汰揀冗長刨。攀看枝條芽甲坼，花綻芳菲覆紫苞。
靚妝留客勝看竹，瓊玖思人愛棠茅。玫瑰笑我多情種，多情總被絕情嘲。
生色春華榮落裡，流水十年久定交。世塗蠻觸成斑髮，纔悟當時莖刺捎。
骨肉今成飄絮轉，鄉心一夜杜鵑咬。

9. 陽臺手種桂樹花開，怡然賦詩

樓頭曲檻向陽栽，嘉種疑從月裡來。有苗前歲逢田圃，枝小形臞猶乞哀。
花面衰顏依稀似，我見生憐置入培。宜春擇吉藏金屋，自攜手甕灌盆苔。
泉溉泥封勤護惜，茶湯蛋殼作肥堆。手挑刀翦除莠莠，槁枯萎黃屢刪裁。
灼熱驕陽朝暮炙，紛喧蜂蝶總相猜。應酬荏苒移真骨，偷得金丹下瑤臺。
葉影扶疏忽攢簇，端凝翠梗脫故胎。一片柔心懷舊好，南枝肯放玉苞開。
何須淺碧深紅色，迹遠情幽香做媒。年年發遣新條出，此中真意謝佳哈。

《世說新語·言語篇》：謝太傅問諸子侄：「子弟亦何預人事，而正欲使其佳？」車騎答曰：「譬如芝蘭玉樹，欲使其生於階庭耳。」

10. 桂花釀湯圓

不隨風雨污泥塵，寧向芳醅寄此身。更待上元春夕好，蜜滋糰釀慰天倫。

11. 記阿娘手釀酸梅餉女

阿娘釀梅，先搓白鹽俟其出水，倒去汁液多次，次藏桶內上覆大石，數天後倒出鹽汁，再將梅團曝於日下多時，復一層梅一層砂糖、一層梅一層砂糖放置於甕內醃漬，約一旬啟封，梅香四溢，可謂「慢工出細活」。

三月雨肥梅子多，手搓青實鹵鹽和。持將木桶藏滋味，還覆石磚壓水渦。取出鹵團三獻曝，添摻糖蜜細包羅。啟封香溢饞涎滴，嬌女索嚐笑愛呵。

12. 淡水阿媽酸梅湯，傳聞以梅子為主藥及導引，添入中藥漢方等多種藥材，置土窯慢火燉熬而成

銅碗聲聲街里喚，一甌冰水注梅湯。叢編遺事元京兆，更餉臺瀛勝杜康。消暑沁脾堪解渴，安神止熱轉平良。醞醅醞釀家常味，藥草調和鼎鼐方。杯物價賤宜正字，阮囊羞澀卻無妨。聞說饕客趨如鶩，我亦效顰試飲涼。醞醞酸甜迴盪久，猶聞睡醒齒舌香。

陳師道，官任秘書省正字，卒於官，家貧而能詩，為宋朝江西派宗師之一。

13. 中興新村雨中觀荷，忽憶西施遺事

不見西施魂魄返，一塘倩影為誰香？美人顧影憐枝瘦，陰雨飄蕭感氣涼。流水枯榮空色相，嬋娟離合夢梁鄉。珍珠零落難收拾，藉得紅衰憶珮琅。

14. 鵲城初戀

凝眸巧笑妍，演漾綺窗前。愛染酸甜味，琴心長短絃。青絲吹白髮，錦瑟想華年。老去春依舊，倩誰折杜鵑？

15. 臺大杜鵑花節曾導覽傅園、瑠公圳

蜀魄滴春陰，杜鵑佳節臨。鐘敲頻醒聵，口說數鉤沉。遊賞瑠公圳，緬思前輩心。麻姑滄海變，仰止到仍孫。

16. 臺灣師範大學校園阿勃勒，黃花串串，形狀甚美

士女風騷何處尋？紅磚牆內緬青衿。百年興替渾如夢，偏向嫩黃開到今。

17. 南海荷園

慇懃培育費工夫，萬梗娉婷出碧蕪。翠袖紅衣迎客舞，藕根蓮實絕塵濡。詩吟秀色成天籟，筆染丹青即畫圖。漫效東坡誇潑灑，千人看煞小西湖！

18. 養荷得藕口占一絕

荷塘襟抱隨舒卷，晴雨不愁意態閒。一世枯榮開且落，祇留清白在人間。

19. 霧社沿線，瀑布、緋櫻點染爭春

一夕東風添暖意，山中攬勝且長歌。滿城紅粉飄香榭，無限青春點綠波。窈窕緣邱隨遠近，蹁躑化蝶舞婆娑。芳辰有意揮神筆，藻繪江山別致多。

20. 詠電子花圖片代傳情意

造化不凋長命種，千嬌百卉下瑤墀。何須作手勞耘耔，卻愛傳心答故知。
一片紅塵開寂寞，繽紛解語減相思。翻山越嶺真彈指，千里靈犀寸簡窺。

21. 杭菊潤肺養腎清肝火，苗栗、台東多有栽植

風霜向晚欺，眾卉已凋時。細葉抽輕翠，圓花簇素蕤。還持故國色，移臺結芳芝。南北有泉溉，田耕力不辭。粲粲黃金溥，亭亭白玉滋。性平潤臟腑，延齡卻老姿。東籬閒採掇，箋葉坐題詩。長安公子癖，紅樓麗人詞。點茶煎七碗，盧仝是我師。乘風升天去，物化豈蝶癡。

杜牧：塵世難逢開口笑，菊花應插滿頭歸。《紅樓夢》：寶釵、黛玉、湘雲、探春各有菊花詩。

22. 春仔花，又稱纏花，係婚嫁時男女兩家女眷所佩戴之髮飾，樣式有龜、鹿、百合、石榴等等，適宜不同的身分與角色，取其寓意吉祥

關雎詩詠樂陶然，鸞鳳訂盟遠近傳。結髮纏花嬌欲滴，寓形龜鹿福連綿。
盈門珠履三千客，滿室春風兩姓緣。恐負嘉招先祝賀，石榴生子約明年。

23. 廿年前購得土耳其玫瑰，所費不貲，花形碩大甚香，花心紫暈色，開花期較尋常者長

嫣紅重瓣自珍奇，輕紫淡暈檀口脂。阿母笑言添愛女，芳唇欲辯復無詞。

24. 元宵燈節煙火彩燈，天上人間競豔如花

端月元宵夜景奇，從容休沐駕驅馳。抽身繁瑣紅塵立，即目崢嶸老眼追。
火蕊凌霄形變幻，花燈照面影參差。瑤池潑灑琉璃碎，天上人間競妙姿。

25.東海大學一甲子鳳凰老樹，曾奄奄欲息，師生亟延醫診治，今復欣欣向榮

長青忘歲月，甲子夕陽中。纓珞垂花幕，宛如蝴蝶叢。
燦晴嬌倩笑，飛紅暈夏風。因知炎燠地，此木最情濃。
寒熱相偕去，可憐氣力窮。連綿暴雨至，敲倒態龍鍾。
臃腫根猶在，參差葉尚豐。師生奔走告，計挽老頹癯。
延醫相救治，調理養微躬。繩綁傾斜幹，欄圍若禁宮。
深居成豹隱，坐待脫胎功。歷歷陰陽轉，形骸感化通。
老樹回春再，顛頷易龍蔥。婆娑翡翠羽，綺麗鳳凰絨。
松鼠攀條戲，招來舊識蜂。仰觀無限意，嘖嘖讚天工。

26.陽臺種小辣椒，花白果紅，嬌小可愛

獻歲開春和暖日，盆栽播籽待苗抽。折肱損耗磨經驗，流光變化葉如油。
數叢艷麗邀青眼，幾度有緣頻滯留。蜂蝶逡巡香結夢，丹珠旖旎象垂旒。
人花相視多嫵媚，剛腸疾烈形嬌柔。紅熟綠新堪採實，佐餐色味勝常饈。

27.仰觀鼠戲風鈴花偶感

校苑風鈴燦爛黃，落英迤邐好徜徉。抬頭松鼠加餐飯，擲手殘花散綺章。
忍踏重茵收艷骨，拏掇泥絮置奚囊。留心枯槁悲昌谷，且效顰顰觸景傷。

林黛玉字顰顰。李賀生於福昌縣昌谷，有詩：我當二十不得意，一心愁謝如枯蘭。

28. 玫瑰花茶

芳菲移自玉龍墀，濯錦宮妝奪曙曦。穠艷猶憐顏彩繪，玉肌堪比露凝脂。

不教諛佞摧嬌體，願做君臣佐藥資。點注湯泉花乳味，清甘徹骨滌塵疲。

中醫藥處方有所謂君臣佐使之基本原則。

29. 貓空茶事

樓依山勢起，茶味靜中深。煩惱花開落，菩提漏盡臨。

30. 卜算子秋菊

爛漫染金華，道盡秋光好。一季生機豐滿時，香影堪團抱。 富貴易無痕，

歸去不如早。脫冠還成杖履翁，耕讀南山老。